

- REV LAROUZÉ -

An chanté ka monté dan nanm-mwen,
An mélodi koulé an fon tjè-mwen.
Lariviè ka palé ba mwen, ka di mwen tou ba.
"Mwen enmen lè premié réyon soley kléré,
Ka vini pozé anlè wob-mwen".
Mil koulè pou an lakansiel,
Mil réyon soley, mil koulè dan siel.

An gout dlo karésé lapo-mwen,
I désann séré an fon lanmen-mwen ;
Sé dènié lespwa larouzé, Diamant éphémère.
Ka révé lè premié labriz ka dousinen'y,
Lè premié réyon soley touché-y,
Ka fèy tounen an lakansiel.
Mil réyon rouzé, mil diaman soley.

"Mé sa mwen anvi, sa mwen ka révé,
Sé kè an maten jou wouvè touvé mwen chanjé.
Si mwen té pé mayé lariviè,
Mwen té kay chanjé tout divini-mwen ... É travèsé l'éternité".

An ti perl karésé fidji-mwen,
I té ka sòti tout an fon zié-mwen.
Mwen fèy tonbé an lanmen-mwen, rijwenn larouzé.
Mélanjé, mwen fè yo glisé ora dlo-a,
An bra lariviè wouvè ba yo.
Yo mayé dan an lakansiel.
Mil gout dlo chanté, mil soley kléré.

Mil gout dlo chanté Mil soley kléré (Ad Lib)